

Praksa Evropskog suda za ljudska prava 16. i 18. juna 2026. godine¹**Iskrenovic protiv Srbije (br. 39427/23), 16.6.2026. godine****Povreda člana 6. st. 1. i 3(d) (pravo na pravično suđenje / pravo na pozivanje i ispitivanje svjedoka)**

Podnosilac predstavke je Jovan Iskrenović, državljanin Srbije rođen 1986. godine i živi u Beogradu.

Podnosilac predstavke je 11. jula 2020. godine uhapšen u centru Beograda i lišen slobode, u kontekstu protesta protiv mjera donijetih u cilju suzbijanja pandemije uzrokovane virusom COVID-19. U to vrijeme je na snazi bila zabrana javnih skupova i policijski čas.

Sljedećeg dana osuđen je u prekršajnom postupku zbog vrijeđanja policije. Prekršajni sud u Beogradu je saslušao iskaze gospodina Iskrenovića i policijskog službenika koji je izvršio hapšenje, čiji su navodi bili oprečni. Policijski službenik je izjavio da je gospodin Iskrenović njemu i kolegi uputio niz uvreda i psovki dok je prolazio ulicom pored njih, te da je potom pobjegao uprkos njihovom naređenju da stane.

Gospodin Iskrenović je osporio ovu verziju događaja, te naveo da su ga policijski službenici oborili na tlo i da ih on ni u jednom trenutku nije uvrijedio. Prema njegovim riječima, saopšteno mu je da se odvodi u pritvor zbog nošenja maske *V za Vendetu* odnosno maske Anonimusa, koja se učestalo koristi kao simbol protesta i anti-establišment pokreta. Sva pravna sredstva koja je izjavio protiv osude su se pokazala neuspješnim. Podnio je i ustavnu žalbu, koja je odbijena 2023. godine. Tokom svih ovih postupaka zahtjevao je od sudova da pribave video-snimke sa sigurnosnih kamera i saslušaju svjedoka događaja. Svi njegovi zahtjevi su odbijeni, kao i njegove pritužbe na propust sudova da obrazlože odbijanje ovih zahtjeva. Izrečena mu je kazna zatvora u trajanju od 60 dana, koju je djelimično izdržao, dok je ostatak preinačen u novčanu kaznu.

Pozivajući se na član 6. st. 1. i 3(d) Konvencije, podnosilac predstavke je istakao da postupak protiv njega nije bio pravičan zbog odbijanja srbijanskih sudova da saslušaju svjedoka ili pribave video-dokaze za koje je smatrao da bi potkrijepili njegovu verziju događaja i dokazali njegovu nevinost. Istakao je i povredu člana 1. Protokola br. 1 Konvencije (zaštita imovine) u pogledu novčane kazne koja mu je izrečena.

Evropski sud je utvrdio da se predmet podnosioca predstavke zasnivao na vjerodostojnosti iskaza policijskog službenika koji je izvršio hapšenje a koji se razlikovao od iskaza podnosioca predstavke. U tom kontekstu je dalje utvrđeno i to da zahtjevi podnosioca predstavke da domaći sudovi saslušaju svjedoka i pribave video snimke sa sigurnosnih kamera nisu bili niti neosnovani niti usmjereni na zloupotrebu postupka. Ovo stoga što bi ovako prikupljeni dokazi mogli da pomognu da se raščisti navedena razlika u iskazima i utvrdi da li je podnosilac predstavke bio dovoljno blizu policijskim službenicima da bi ih uvrijedio ili su pak oni bili ti koji su njega bili prethodno primjetili i potom i pratili. Međutim, domaći sudovi nisu na odgovarajući način razmotrili relevantnost ovih dokaza niti su pružili dovoljno razloga za odbijanje zahtjeva za njihovo pribavljanje i ispitivanje. Iz ovoga je dalje utvrđeno da je osuda podnosioca predstavke bila u suštini zasnovana samo na iskazu policijskog službenika koji je izvršio hapšenje, što je odbrani onemogućilo da efikasno ospori optužbu, a čime je narušena ukupna pravičnost postupka.

¹ Informacije su pripremljene u saradnji između Ustavnog suda Bosne i Hercegovine i Odjela za sudsku dokumentaciju i edukaciju Sekretarijata Visokog sudskog i tužilačkog vijeća Bosne i Hercegovine. Iste su informativnog karaktera i ne obavezuju Sud.

Société d'Exploitation d'un Service d'Information - CNews protiv Francuske (br. 41355/23), 18.6.2026. godine

Nema povrede člana 10. Ek

Podnosilac predstavke je privredno društvo osnovano prema francuskom pravu, sa sjedištem u Issy-les-Moulineaux. Ono upravlja televizijskim kanalom CNews.

Predmet se odnosi na opomenu (formalno upozorenje) koju je podnosiocu predstavke izreklo Regulatorno tijelo za audiovizuelne i digitalne komunikacije (ARCOM), nakon izjava koje je 21. novembra 2021. godine dao specijalista za infektivne bolesti u emisiji „*Les Points sur les* i”. Opomenom je od podnosioca predstavke zahtijevano da poštuje svoje obaveze, da osigura poštenost i tačnost u predstavljanju i obradi informacija, da garantuje iznošenje različitih stavova o spornim pitanjima te da, u svim okolnostima, zadrži kontrolu nad svojim programskim sadržajem.

Pozivajući se na član 10. (sloboda izražavanja), podnosilac predstavke se žali na formalnu opomenu koju mu je izrekao ARCOM.